



Uunga siunnersuut: Illuliortiternernut aningaasalersuineq pillugu Inatsisartut inatsisaata allanngortinneqarnissaa pillugu Inatsisartut inatsisaat nr. xx, xx. xxx 2020-meersoq. (Nutaanik inissialiornissamut taarsigassarsiaritit taamaallaat inunnt taarsigassarsiaritinneqartassapput aammalu inuit inissiamut ataatsimut taamaallaat taarsigassarsisinnaallutik)

(Ineqarnermut Attaveqatigiinnermullu Naalakkersuisoq)
(Siullermeerneqarnera)

Demokraatit pingaartittorujussuaat, innuttaasut amerlanerpaat namminnerisaminnik ineqarnissaat. Ullumikkut imaappoq, innuttaasut amerlanerpaartai attartukkamik ineqartartut. Isumaqaqpugut, politikikkut anguniartariaqaripput, amerlanerpaat namminneq pigisassaminnik imaluunniit piginneqatigiilluni inissiaatileqatigiinni inissiamik pisisassasut.

Uani siunnersuummi Naalakkersuisut qulakkeerusuppaat, inuinnaat kisimik, pisortanit taarsigassarsisinneqarsinnaassasut aammalu pisortanit taarsigassarsiaq inummut ataasiinnarmut tunniunneqartassasoq. Pingaarnertut siunertaasoq unaavoq, illusinissamut aningaasaliinermut inatsit innuttaasunut amerlanerpaanut sapinngisamik iluaqutaanissaa. Tamanna Demokraatit silatusaartutut isigaat politikkerilluinnaratsigu, amerlanerpaat namminerisaminnik illoqarnissaat.

Demokraatinulli pingaartuuvoq, siunnersuut illoqarfinni annerusuni illuliortiternerup unittoornissaa nikinguneqassanngitsoq. Isertuussassaanngilaq, inuppasuit ukiuni makkunani illoqarfinni annerni najugaqarusuttarnerat. Tamanna akerlilersorneqassanngilaq, pingaarnertut tunngaviujuartariaqarmat, inuit tamarmik kiffaanngissuseqarlutik aaliangertassagaat, sumi najugaqarusunnerlutik.

Taamatullu pingaartutut isigaarput, sanatitsisut illunik nutaanik sananissaminnut taarsigassarsiniarsinnaajuarnissaat.

Tamanna tunngavigalugu qulaarutiginninnerput oqaatigerusupparput, ilumut isumassarsiatsialaanersoq illu nutaaq atulernissaanut akuersissutip nalunaarutigineraniit kingusinnerpaamik qaammatit arfinillit qaangiuppata inuinnartut tuniniarneqarsinnaasoq. Taanna piffissarititaasoq sivikippallaarsorinarpoq. Immaqa piffissarititaasoq allanngortittariaqarpoq imaalillugu qaammatit 12 aamma 18 akornanni pisinnaanngorlugu?

Demokraatit kajumissaarutigerusuppaat, Sanaartornermut Ataatsimiititaliap sukumiisumik misissussagaa, siunnersuut tassunga tunngassoq allanngortinneqartariaqannginnersoq. Taamatullu ataatsimiititaliap sukumiisumik misissuinissaa piumasaraarput siunnersuutip ilaani siunnersuuteqartoqarsimanersoq, taama piniangikkaluarluni illoqarfinni annerusuni illuliornermik unikaallatsitsisussamik.

Taamatut oqaaseqarluta siunnersuut Sanaartornermut ataatsimiititaliamut suliareqqitassanngorlugu ingerlateqqipparput.